

# 1 Jon

## Naoa itəm Jon tēmaupən mətē

### Nəghatən əkuəkīr rəha naoa u 1 Jon

**?Pah tēmətē naoa u?** Aposol Jon tēmətē naoa u. In pia Jemes, kən ilau nēti Sepeti mil. In kit rəha netəm tuelef rəha Iesu. Kən in etəm u itəm Iesu tolkeike pik. In tēmətē naoa min u: Namnusən Təwir Itəm Jon Tēmətē, 1 Jon, 2 Jon, 3 Jon, ne Nol Əpən.

**?Tēmətē tatuwin kəm pah?** Tēmətē naoa u tatuwin kəm netəmim rəha niməfak min ikin min rafin. In tolkeike mēmə netəmim ikin kitiəh-kitiəh okotafin, kən motahl-ipən naoa u tatuwin e niməfak min ikin pişin pişin min.

**?Nəmegəhən tahro nulan nian tēmətē?** Netəmim neen kotəmə Iesu Kristo sənəmə in Nēti Ughin pahrien itəm tēmuwa etəmim pahrien kit. Koatən mēmə narmin rəha Kristo tēmuwa e nipəti suah əh Iesu nian Jon Baptaes tēmol baptaes lan. Kən narmin rəha Kristo tiet e nipəti Iesu, uarisig timis e niğ kəməluau. Məto nəgətunən əh in neiuəən. Kən moatəgətun mēmə nolən rat in tikə. İlat neen kotəmə təwir əm mēmə netəmin okotol ənəpən əm nolən rat məto-inu e rəhalat nəgətunən, nipəti etəmim in nat ənəpən əm. Nərgi nəgətunən min əh, kətaun-in mēmə “Nostisisim.”

**?Tēmətē naoa u o naka?** Tēmətē naoa u mēmə otəgətun min nəghatən itəm tətuatip, kən mēmə otən-iarəp neiuəiə minən rəha iəgətun eiue min. Kən tēməgətun mēmə nolkeikəən in nat asol. Kən mōlkeike mēmə otasitu, kən mōl nahatətəən rəha iəfak min tuwa məskasik kən motitun wir mēmə Ughin təmosmegəh pahrien ilat, kən ilat moatos nəmegəhən lilin.

### Nəghatən Megəh

**1** <sup>1</sup>Nəghatən rəha nəmegəhən<sup>a</sup> təmaupən matig e nətuounən nian,<sup>b</sup> inun, itimat<sup>c</sup> emotəto kən motəplan e niganəmtitimat ətuatip.<sup>d</sup> Emotehm, kən motek e nelmitimat ətuatip.<sup>e</sup> In un, in nəghatən rəha nəmegəhən itəm ekoatəghat-in, moatən-iarəp.<sup>2</sup> Nəmegəhən əh təmiet-arəpa;<sup>f</sup> emotehm kən moatətul-arəp o nən-iarəpən,<sup>g</sup> kən moatən-ipinə kəm itəmat məmə in nəmegəhən lilin, in təmətatig ilau Tata Uhgın kən təmiet-arəpa otimat.<sup>h</sup> <sup>3</sup>Ekoatən-iarəp kəm itəmat natimnat min itəm emotehm kən motəto rəkis, məmə itəmat min onəkotuwa kol kitiah kitat min itəmat. Okotuwa kitiah kitat Tata Uhgın ne Nətin, Iesu Kristo.<sup>i</sup> <sup>4</sup>Ekoatəte natimnat min u məmə otol nagienən e nikitat tər marioah.

### Okotaliwək e nəhag-əhagən

<sup>5</sup>Nəghatən u inu, itimat emotəto ron kən ioatən-ipinə kəm itəmat, məmə Uhgın in nəhag-əhagən,<sup>j</sup> kən nəpinəpən tikə agin lan. <sup>6</sup>Okəmə kitat kotəmə kinoatol kitiah kitat min, məto kitat kotaliwək e nəpinəpən,<sup>k</sup> kən koateiuə, kən məsotatigən e nıpahrienən.<sup>l</sup> <sup>7</sup>Məto in tətətig e nəhag-əhagən, kən okəmə kotaliwək e nəhag-əhagən tahmen lan,<sup>m</sup> kən kitat koatol kitiah kitat min, kən kitat okotarətuəh<sup>n</sup> o e nolən rat min rafin e nita Nətin, Iesu. <sup>8</sup>Okəmə kitat kotəmə sənəmə kitat nol təfagə rat,<sup>p</sup> kitat koateiuə-in atip əm kitat min, kən nıpahrienən tikə etat.<sup>q</sup> <sup>9</sup>Uhgın in etəm kitun nagileən lan, kən rəhan nolən in tətətuatip əm.<sup>r</sup> Tol nəhlan, okəmə kitat kotən-ipən nolən rat min rəhatat kəm Uhgın,<sup>s</sup> kən in otəfəl kitat kən maluin rəhatat nolən rat min, kən maruətuəh rəkis in nolən rat min rafin rəhatat mə okotətuatip e niganəmtin.<sup>t</sup>

**a 1:1** Jon 14:6 **b 1:1** Jon 1:1,3 **c 1:1** Naoa u, Aposol Jon in təməte. Kitat kotəruu təməte kəm pah. Nat ənpənin məmə in tatən pik “itimat,” məto Jon pisin əm təməte. Tatən itimat, matəghat-in atip in ne aposol min neen. **d 1:1** Luk 24:48; Jon 1:14; 19:35; 2 Pita 1:16; 1 Jon 4:14 **e 1:1** Jon 20:27 **f 1:2** Jon 1:1-4; 11:25; 14:6 **g 1:2** Jon 15:27 **h 1:2** Jon 1:1-4 **i 1:3** 1 Kor 1:9 **j 1:5** 1 Tim 6:16 **k 1:6** Jon 3:19-21; 8:12; Efes 5:8; 1 Jon 2:11 **l 1:6** 1 Jon 2:4; 4:20 **m 1:7** Aes 2:5 **n 1:7** Okəmə kotəruətuəh e niganəmti Uhgın, okotən-iarəp əm təfagə rat min kəmotol kəsotahmenən e niganəmti Uhgın. Məto sənəmə tahmen e naruətuəhən itəm kətaig e nien o nos-irəkisən nətuəkəmən kit e nıpətətəm. Kitat okotəkəike motəruətuəh e nita Iesu, məmə in otos-irəkis nolən rat min rəhatat. Tol nəhlan, kitat kotətuatip, motəruətuəh e niganəmti Uhgın, in təsəplanən nolən rat rəhatat, məto-inu nita Iesu təmafəl rəkis. **o 1:7** Hip 9:14; Nol Əpən 7:14 **p 1:8** Jer 2:35; Rom 3:9,19; Jem 3:2 **q 1:8** 1 Jon 2:4 **r 1:9** E naluinən nolən rat rəha nol təfagə min, Uhgın in tatol e nətuatipən, məto-inu nimisən rəha Iesu in təmətəu rəkis nolən rat min. Tol nəhlan, tətətuatip məmə Uhgın otaluin nolən rat min rəhatat mətafəl rəkis. **s 1:9** Sam 32:3-5; 51:2; Prov 28:13 **t 1:9** Jer 31:34; Maeka 7:18-20; Hip 10:22

<sup>10</sup>Okāmā kitat kotāmā kəsotol aġin-əhən nolən rat, kən kitat koatən neiuəən e Uhgın, kən rəhan nəghatən təsatiġ aġin-əhən e nəmegəhən rəhatat.<sup>u</sup>

### Iesu Kristo in etəmim rəha nasituən etat

**2** <sup>1</sup>Rəhak nisualkələh min,<sup>v</sup> iatəte natimnat min u kəm itəmat, matən-  
iəhau itəmat məmə onəsotolən nat tərət. Məto okāmā suah kit otol  
nolən rat, rəhatat kit əh-ikin etəm tatəghat rəhatat lan kəm Tata Uhgın,<sup>w</sup>  
inu Iesu Kristo in Etəm Tətuatip. <sup>2</sup>In un, itəm təmol sakrifais atip e rəhan  
nəmegəhən o rəhatat nolən rat min, kən o nat u, neməha otəsol minən  
Uhgın.<sup>x</sup> <sup>y</sup>Kən təməsolən o rəhatat pisin əm nolən rat min, məto rəha  
netəmim rafin aġin-əh e nətueintən.<sup>z</sup>

<sup>3</sup>Kitat okotitun əsas məmə kotitun Uhgın<sup>a</sup> okāmā kitat koatol nəwian.<sup>b c</sup>  
<sup>4</sup>Etəm u tatən mə “Ekitun Uhgın,”<sup>d</sup> məto təsolən nəwian, in ieiua, kən  
niphahrienən tikə lan.<sup>e</sup> <sup>5-6</sup>Məto etəm un tatol rəhan nəghatən,<sup>f</sup> nolkeikəən  
rəha Uhgın təmatig minip wir pahrien e nikin.<sup>g</sup> Etəm u itəm tatən məmə  
tatəper-ipən lan,<sup>h</sup> otəkəike mətəp suatip kitiəh əm itəm Iesu təmitəp.<sup>i</sup>  
Nolən u tatəġətun əsas<sup>j</sup> məmə kitat koatatiġ lan.<sup>k</sup>

### Kitat kotəkəike motol nolkeikəən kəm kitat min

<sup>7</sup>Nikik keike min, io esəteən nəghatən wi kit kəm itəmat məmə  
onəkotol, kən məto iatəte in oas<sup>l</sup> itəm nəmotos rəkis e nətuounən, nian  
nəmotəto namnusən təwir;<sup>m</sup> nəghatən oas u in nəghatən ninəmotitun.  
<sup>8</sup>Məto e nehmən kit min, nəghatən u itəm iatəte tatimnə otəmat məmə  
onəkotol, in tatəuhlin məmə nəghatən wi,<sup>n</sup> məto-inu kinəplan e suatip  
wi kit e nəmegəhən rəha Iesu ne rəhatəmat. Məto-inu roiu, napinəpən  
tinatagim,<sup>o</sup> kənu nəhag-əhagən pahrien<sup>p</sup> tinatasia rəkis.<sup>q</sup>

u 1:10 Jon 5:38 v 2:1 1 Tes 2:11 w 2:1 Rom 8:34; 1 Tim 2:5; Hip 7:25

x 2:2 Rom 3:25; 1 Jon 4:10 y 2:2 Iesu in təmol sakrifais atip e nəmegəhən rəhan o  
rəhatat nolən rat min, kən o nat əh, neməha təsol minən Uhgın. Iesu in sakrifais, kən  
in pris min itəm təmol sakrifais u. Iesu təsətapəhən o Uhgın məmə otən məmə kitat  
kəməsotolən nolən rat kit, məto tətəpəh o Uhgın məmə otəplan kitat məmə kitat netəm  
rəhatat nolən rat min kəmotos rəkis nalpinən. Neməha rəha Uhgın, Kristo in təmos,  
təmol sakrifais atip e rəhan nəmegəhən. Kən nat u, in tinahmen. z 2:2 Jon 3:17

a 2:3 1 Jon 4:13; 5:2 b 2:3 Nolən nəwian un, təsolən kitat kotətuatip, məto tatəġətun  
əm məmə kitat kotitun Uhgın. c 2:3 Jon 14:15 d 2:4 Taet 1:16; 1 Jon 3:6; 4:7,8

e 2:4 1 Jon 1:6,8 f 2:5-6 Jon 14:15 g 2:5 1 Jon 4:12 h 2:5 Nian tatən məmə suah  
kit tatəper-ipən e Iesu, nipətin u məmə in tətatiġ lan məsietən, tətisi-pən lan, tatətul-pən  
ron, tatos rafin nəsanəhən rəhan ron, tatagile lan, tatilpin ilau min. i 2:5 Mat 11:29

j 2:5 1 Jon 2:3 k 2:5 Jon 15 l 2:7 Dut 6:5; Lev 19:18 m 2:7 1 Jon 2:24; 3:11,23; 4:21;  
2 Jon 5,6 n 2:8 Jon 13:34 o 2:8 Rom 13:12 p 2:8 Jon 1:9 q 2:8 Efes 5:8; 1 Tes 5:5  
r 2:9 1 Jon 3:10,15,16; 4:20,21 s 2:9 1 Jon 1:5

<sup>9</sup>Kən etəm u tatən mə in tətətig e nəhag-əhagən məto tatətəhau pian,<sup>r</sup> in tətətig əh e napinəpən.<sup>s</sup> <sup>10</sup>Etəmim u itəm tolkeike pian, in tatətul e nəhag-əhagən,<sup>t</sup> kən nat kit tikə e nikin məmə otəpətətəl lan, morin.<sup>u</sup>

<sup>11</sup>Məto etəmim u itəm tetəhau pian, in tətətig e napinəpən,<sup>v</sup> kən mətan e napinəpən, kən məruru ikin tatuwin-pən ikin, məto-inu napinəpən tatohamis niganəmtin.<sup>w</sup>

<sup>12</sup>Rəhak nisualkələh min, iatəte naoa u kəm itəmat, məto-inu Uhgin təmafəl rəkis nolən rat min rəhatəmat o nat u itəm Iesu təmol.

<sup>13</sup>Tata min, iatəte nat u kəm itəmat, məto-inu itəmat nəmotitun in, itəm təmaupən matig e nətuounən.<sup>x</sup> Netəm aluə min, iatəte nat u kəm itəmat, məto-inu itəmat nəmotol win<sup>y</sup> e etəm rat, Setan.

<sup>14</sup>Nisualkələh, eməte nat u kəm itəmat, məto-inun nəmotitun Tata Uhgin. Tata min, eməte nat u kəm itəmat, məto-inu itəmat nəmotitun in, itəm təmaupən matig e nətuounən.<sup>z</sup> Netəm aluə min, eməte nat u kəm itəmat, məto-inu itəmat nakotəsanən,<sup>a</sup> kən nəghatən rəha Uhgin tətətig e nikitəmat, kən nəmotol win e etəm rat, Setan.<sup>b</sup>

### Sotolkeikeən natimnat rəha nətueintən

<sup>15</sup>Sotolkeikeən nətueintən<sup>c</sup> o natimnat min rəha nətueintən. Okəmə suah kit tatolkeike nətueintən, kən nolkeikeən rəha Tata Uhgin təsatigən e nikin.<sup>d</sup> <sup>16</sup>Məto-inu natimnat rafin e nətueintən u, təsisi-pənən o Tata Uhgin, məto rəha nətueintən əm. Natimnat u rafin rəha nətueintən, ilat u, naumisən o natimnat rəha nipətətəm əm,<sup>e</sup> kən naumisən o natimnat itəm tatiuw rəkis niganəmtitəm,<sup>f</sup> ne nausitən o rəhan nautə min ne nepətən. <sup>17</sup>Kən nətueintən u otəpanikə. Kən naumisən o nautə min otəpanikə. Kən naumisən o nolən min rəha nətueintən itəm koatiuw nətəlīgən rəha netəmim otəpanotikə.<sup>g</sup> Məto etəmim itəm tatol nəwia Tata Uhgin,<sup>h</sup> in otətətig lilin.

t 2:10 1 Jon 3:14 u 2:10 Sam 119:165 v 2:11 1 Jon 1:6 w 2:11 Jon 11:9; 12:35  
x 2:13 Jon 1:1 y 2:13 Jon 16:33 z 2:14 Jon 1:1 a 2:14 Efes 6:10 b 2:14 1 Jon 2:13;  
Sam 119:9-11; Jon 5:38; Hip 4:12; 1 Jon 1:10 c 2:15 Rom 12:2 d 2:15 Jem 4:4  
e 2:16 Jen 3:6; Rom 13:14; Efes 2:3 f 2:16 Prov 27:20 g 2:17 Hip 12:27  
h 2:17 Mat 12:50 i 2:18 Rom 13:11 j 2:18 Tikimir rəha Kristo in 'antichrist' e Inglis.  
k 2:18 1 Jon 2:22; 4:3; 2 Jon 1:7 l 2:18 1 Jon 4:1

### Tikimir min rəha Kristo kinotuwa rəkis

<sup>18</sup>Nisuwalkələh, kotegu-pən e namnun nian.<sup>i</sup> Nəmoatəto məmə tikimir kit rəha Kristo<sup>j</sup> otuwa.<sup>k</sup> Kən roiu tikimir min rəha Kristo tepət, kinotuwa rəkis.<sup>l</sup> Tol nəhlan, kitat kotitun məmə inu, kinoatəgu-pən e namnun nian.<sup>19</sup>Netəm min u, kəmotapəs rəhatat niməfak min<sup>m</sup> məto-inun ilat sənəmə rəhatat aɡin-əh min. Okəmə rəhatat aɡin-əh min, kəməsotietən etat. Məto ilat kəmotiet etat, məmə otəgətun məmə ilat sənəmə rəhatat min.

<sup>20</sup>Məto itəmat un, Etəm Tətuatip, in təmətəfiə<sup>n</sup> kəm itəmat e Narmin Rəha Uhgın,<sup>o</sup> kən itəmat rafin nəkotitun nat u. <sup>21</sup>Iatəte nat u kəm itəmat, sənəmə nəkotəruru nıpahrienən, məto itəmat nınotitun rəkis nıpahrienən, kən motitun məmə nıpahrienən təsoe-inən neiuəən.<sup>p</sup> <sup>22</sup>?Pah u in ieiua? Etəmim u itəm tatən məmə Iesu sənəmə in Kristo itəm Uhgın təmən məmə otahl-ıpa. Etəmim u inu, in tikimir rəha Kristo. In təsənən nıpahrienən e Tata Uhgın ne Nətın.<sup>q</sup> <sup>23</sup>Etəm təsənən nıpahrienən e Nətın təruru nosən Tata. Etəm tatən nıpahrienən e Nətın, in tatos min Tata Uhgın.<sup>r</sup>

<sup>24</sup>Pəs nat naka nəmotəto e nətuounən, nian nəmotəto namnusən təwir, otatəper-ıpən əh etəmat tiəkis. Okəmə nat naka nəmotəto e nətuounən otatəper-ıpən etəmat, kən itəmat onakoatəper-ıpən e Nətın, ne Tata Uhgın.<sup>s</sup> <sup>25</sup>Kən nat u inu, nəmegəhən itulın, in təmən-ıəkis məmə otos-ıpa kəm kitat.

<sup>26</sup>Iatəte nəghatən min u kəm itəmat matən-ıarəp netəm min u itəm okotıuw rəkis itəmat.<sup>t</sup> <sup>27</sup>Məto itəmat u, nətəfiəən rəha Narmin Rəha Uhgın itəm nəmotos e Kristo,<sup>u</sup> in tətətig əh e nikitəmat. ?Tol nəhlan, pah min titun nəgətunən nat wi kit kəm itəmat? Narmin Rəha Uhgın tatəgətun natımnat rafin kəm itəmat,<sup>v</sup> kən nətəfiəən əh rəhan, in nıpahrienən, sənəmə neiuəən. Tol nəhlan, otəper-ıpən əskasık lan,<sup>w</sup> təhmen-pən əm məmə in təməgətun itəmat məmə nəkotol.

<sup>28</sup>Kən roiu əh, nisuwalkələh, otəper-ıpən lan, məmə nian in otuwa<sup>x</sup> kən kitat kəsotəɡinən məsotaulis-inən nıɡanəmtın<sup>y</sup> e rəhan nuwamən.

---

**m 2:19** Wək 20:30 **n 2:20** Netəm Isrel kotətəfiə-pən e rəhn-kapə pris min e oel, moatol kən tatəgətun məmə ilat u, sənəmə netəmim əpnarın əm, məto ilat u, netəmim rəha Uhgın əm, itəm in təmıtəpun o nolən wək u. Kən e nolən kitiəh əm, Iesu in tatos-ıpa Narmin Rəha Uhgın kəm netəm min u itəm koatan nıpahrienən lan, matəgətun məmə Kristo təmıtəpun ilat mə rəhan əm. Netəm min u itəm koatos nətəfiəən e Narmin Rəha Uhgın, in təhmen e nəmtətın kit məmə ilat u, rəhan min netəmim. Tatətəfiə-in-pən Narmin Rəha Uhgın elat məmə ilat kotəhmen-in nolən wək rəhan. **o 2:20** 1 Jon 2:27; 2 Kor 1:21-22 **p 2:21** 2 Pita 1:12 **q 2:22** 1 Jon 4:3; 2 Jon 1:7 **r 2:23** Jon 8:19; 14:7; 1 Jon 4:15; 5:1; 2 Jon 1:9 **s 2:24** Jon 14:23; 15:4; 1 Jon 1:3; 2 Jon 9 **t 2:26** 1 Jon 3:7 **u 2:27** 1 Jon 2:20 **v 2:27** 1 Kor 2:12 **w 2:27** Jon 15:4 **x 2:28** 1 Jon 3:2; Kol 3:4 **y 2:28** Efes 3:12 **z 2:29** 1 Jon 3:7 **a 2:29** Jon 1:13

<sup>29</sup>Okämä nəkotitun mēmә in tətuatip,<sup>z</sup> onəkotitun әsas mēmә netәmim rafin itәm koatol nolән әtuatip, ilat u, nenәtin min.<sup>a</sup>

### Itәmat u nenәti Uhgин min

**3** <sup>1</sup>!Oteplan-tu! !Nolkeikeән itәm tepәt mahgoau kәm kitat,<sup>b</sup> itәm Tata Uhgин tәmos-ipa, inun, mēmә tәtaun-in kitat mēmә nenәtin min!<sup>c</sup> Kән nipahrienән mēmә kitat әh. Netәmim rәha nәtueintән kәsotitunән kitat, mәto-inun ilat kotәruru Uhgин.<sup>d</sup> <sup>2</sup>Nikik min, kitat nenәti Uhgин min u-roiu. Kitat kәsotitunән mēmә okotәhrol nulan motol pisin nian Kristo otitәlig-pa. Mәto kitat kotitun mēmә nian otitәlig-pa,<sup>e</sup> kitat okotahmen lan,<sup>f</sup> mәto-inu e nian әh, okotәplan әsas mēmә in tol nәhlan.<sup>g</sup> <sup>3</sup>Kән etәmim itәm tatagile mēmә otahmen e Kristo, in tәtaruәtuәh rәkis<sup>h</sup> in atip nolән min rәhan,<sup>i</sup> mәto-inu Kristo in min in tətuatip wir agin.

<sup>4</sup>Etәmim itәm tatol nolән rat, in tatәtgәhl min lou rәha Uhgин, mәto-inu nәghatән u nolән rat, nipәtin u, nәtgәhlән lou rәha Uhgин. <sup>5</sup>Kән itәmat nəkotitun mēmә Kristo tәmuwa mēmә otos-irәkis rәhatat nolән rat min,<sup>j</sup> mәto-inu nolән rat tikә lan.<sup>k</sup> <sup>6</sup>Tol nәhlan, okämä kitat koatәper-ipән lan, tol-pән okul kәsotәkәikeән e nolән rat min. Mәto netәm min un itәm koatәkәike әh e nolән rat min, tol-pән kotәruru agin-әh in, mәsotәplanән in.<sup>l</sup>

<sup>7</sup>Nisualkәlәh, sotәtәlig-inән suah kit teiuә-in itәmat o nat u. Etәm tatol nat әtuatip, nipәtin u mēmә in etәm әtuatip, tahmen әm e Kristo in etәm әtuatip. <sup>8</sup>Mәto etәmim itәm tatәkәike әh e nolән rat min, tatәgәtun mēmә in rәha Setan u, etәm tәmatol nolән rat e nәtuounән.<sup>m</sup> Mәto Nәti Uhgин tәmuwa o nәrәkinән wәk min әh rәha Setan.<sup>n</sup> <sup>9</sup>Netәm min u itәm kәmotaiir wi min motuwa nenәti Uhgин min,<sup>o</sup> ilat okul kәsotәkәikeән e nolән rat,<sup>p</sup> mәto-inu ilat koatos niamitә rәha Uhgин. Kән o nat u, okul ilat kәsotәkәikeән e nolән rat, mәto-inu ilat nenәti Uhgин min.<sup>q</sup> <sup>10</sup>Tol mә, kotitun nәнән mēmә pah min u nenәti Uhgин,<sup>r</sup> kәnu pah min u nenәti Setan.<sup>s</sup> Etәmim u itәm tәsol әtuatipән, kән in mәsolkeikeән pian kit,<sup>t</sup> in sәnәmә nәti Uhgин kit.

**b 3:1** Jon 3:16    **c 3:1** Jon 1:12    **d 3:1** Jon 15:21; 16:2,3    **e 3:2** Kol 3:4; 1 Jon 2:28  
**f 3:2** Rom 8:29; 2 Pita 1:4    **g 3:2** Jon 17:24; 2 Kor 3:18    **h 3:3** Tәtaruәtuәh, nipәtin u, titafәl rәkis.    **i 3:3** 2 Kor 7:1; 1 Jon 1:7; 2 Pita 3:13,14    **j 3:5** 1 Jon 3:8    **k 3:5** 2 Kor 5:21  
**l 3:6** 1 Jon 3:9; 2:4; 5:18; 3 Jon 1:11    **m 3:8** Jon 8:44    **n 3:8** Hip 2:14    **o 3:9** Jon 1:13  
**p 3:9** 1 Jon 5:18    **q 3:9** Nikuti nat tatәwiә noe-in atipән noan. E suatip kitiaә әm, Uhgин tatәlәhәu-pән rәhan niamitә e suah kit, kән in tatәwiә tahmen e nikuti nat itәm kәmәfә e nәmegәhән rәha etәmim u, kән matoe in noan e nolән min rәha Uhgин. Tol nәhlan, netәmim min u itәm kәmotaiir wi min motuwa nenәti Uhgин min, ilat kәsotәkәikeән e nolән rat.    **r 3:10** 1 Jon 3:1,2; Jon 1:12    **s 3:10** 1 Jon 3:8    **t 3:10** 1 Jon 2:9; 4:8

### Kitat kotæike motolkeike kitat min

<sup>11</sup> Nəghatən u inu, nəmotəto e nətuounən e namnusən təwir,<sup>u</sup> məmә kitat okotæike motolkeike itat min.<sup>v</sup> <sup>12</sup> Sotolən tikiri Ken, itəm in etəmim rəha Setan kən tohamnu pian.<sup>w</sup> ?Kən təmohamnu pian o naka? Təmohamnu mətō-inun rəhan nolən min tərət kənu rəha pian, nolən min in tətuatip.<sup>x</sup> <sup>13</sup> Piak min, narmitəmat təsiwig pikən okəmә netəmim rəha nətueintən u koatətəhau itəmat.<sup>y</sup> <sup>14</sup> Okəmә kitat kotalkeike piatāt min, tatəgətun məmә kitat kinotapṛəkis-in rəkis nimisən, minotegu-pən e nəmegəhən.<sup>z</sup> Məto etəm un nolkeikeən tikə lan, in tətatig əh e nimisən.<sup>a</sup> <sup>15</sup> Etəmim un itəm tatətəhau pian<sup>b</sup> in tahmen e etəm tatohamnu itəm,<sup>c</sup> kən itəmat nəkotitun məmә iohamnu itəm, in təsosən nəmegəhən lilin.<sup>d</sup>

<sup>16</sup> O nat u kitat kotitun wir məmә nolkeikeən in tol nulan, mətō-inun Iesu təmos-ipa rəhan nəmegəhən otat.<sup>e</sup> Kən e nolən kitieh əm, təwir mə kitat min kotos-ipən nəmegəhən rəhatat o piatāt min.<sup>f</sup> <sup>17</sup> ?Okəmә suah kit rəhan natimnat tepət kən pian kit rəhan nat kit tikə, mətō in təsasəkitunən pian,<sup>g</sup> məsolən nat aḡin lan, nolkeikeən rəha Uhgīn otəhrol nulan matig e suah u?<sup>h</sup> <sup>18</sup> Nenətik min, pəs kitat kəsotənən nolkeikeən e nohlitāt əm, mətō okotol əp nolkeikeən pahrien e nolən min rəhatat.<sup>i</sup> <sup>19-20</sup> Okəmә kotol nəhlan, kən nat əpnarīn okəmә kotəto-pən e nikitat məmә okotos nalpīnən, mətō kitat okotitun məmә kotatig e nipahrienən, kən mem məha-məha nikitat e niḡanəmtin. Mətō-inu Uhgīn in ilis mapṛəkis-in nikitat, kən in titun natimnat rafin.

<sup>21</sup> Piak min, okəmә kotəto-pən e nikitat məmә okəsotosən nalpīnən, kitat okəsotagīnən e niḡanəmti Uhgīn,<sup>j</sup> <sup>22</sup> kən motos natimnat rafin ron itəm koatətəpəhin-pən,<sup>k</sup> mətō-inu kitat koatol nəwian<sup>l</sup> kən moatol nolən itəm in tolkeike.<sup>m</sup> <sup>23</sup> Kənu nəghatən u rəhan tatən məmә kotəkæike motahatətə e Nətin,<sup>n</sup> Iesu Kristo,<sup>o</sup> kən motolkeike kitat min, tahmen məmә inu in təmən mihin kəm itat.<sup>p</sup> <sup>24</sup> Netəm min u itəm koatol nəwian,<sup>q</sup> ilat koatəper-ipən lan,<sup>r</sup> kən in tatəper-ipən elat. Kən kitat kotitun məmә in tətatig e nikitat, mətō-inun Narmin Rəha Uhgīn itəm in təmos-ipa, in tatəgətun kəm kitat.<sup>s</sup>

### Onakakil mehm mətig narmin min

**4** <sup>1</sup> Nikik min, okəmә etəmim kit tatən məmә Narmin Rəha Uhgīn tətatig lan, matol in tatən-iarəp rəhan nəghatən, kən təwir pik

u 3:11 1 Jon 2:7 v 3:11 Jon 13:34-35; 15:12; 1 Jon 4:7,11,21; 2 Jon 1:5 w 3:12 Jen 4:8  
 x 3:12 Prov 29:10 y 3:13 Jon 15:18,19; 17:14 z 3:14 Jon 5:24 a 3:14 1 Jon 2:9  
 b 3:15 1 Jon 2:9 c 3:15 Mat 5:21,22; Jon 8:44 d 3:15 Kal 5:20,21 e 3:16 Jon 10:11  
 f 3:16 Jon 15:13; 1 Tes 2:8 g 3:17 Dut 15:7,8; Jem 2:15,16 h 3:17 1 Jon 4:20  
 i 3:18 Esik 33:31; Rom 12:9 j 3:21 Efes 3:12; 1 Jon 5:14 k 3:22 Mat 7:7  
 l 3:22 Jon 14:15 m 3:22 Hip 13:21 n 3:23 Jon 6:29 o 3:23 Jon 1:12; 3:18; 20:31  
 p 3:23 Jon 13:34 q 3:24 1 Jon 2:3 r 3:24 1 Jon 2:6; 4:15 s 3:24 1 Jon 4:13

məmә onəkotehm wir motakil mətig məmә narmin əh tətätig lan, in rəha Uhgın pahrien, o sənəmә rəha Uhgın.<sup>t</sup> Kitat okotəkäike motəplan wir mətō-inun ien eiueiüә min tēpət kinotiet rəkis moatəghat e nətueintən.<sup>u</sup>

<sup>2</sup>O nat u, itəmat onəkotitun əsas məmә in Narmin Rəha Uhgın itəm tətätig e etənim kit, inun, Narmin itəm tatən-iarəp məmә Iesu in Kristo itəm Uhgın təmən məmә otahl-ipa, kən in təmuwa e nipətin,<sup>v</sup> narmin əh in Narmin ətuatip rəha Uhgın.<sup>w</sup> <sup>3</sup>Mətō etənim kit itəm təsən-iarəpən məmә Iesu in Kristo itəm Uhgın təmən məmә otahl-ipa, narmin rəha etənim əh, sənəmә rəha Uhgın. Inəh, in narmin rəha tikimir rəha Kristo,<sup>x</sup> <sup>y</sup> itəm ninəmotətō rəkis məmә in otəpanuwa, kən roiu tinətätig rəkis e nətueintən.<sup>z</sup>

<sup>4</sup>Nisualkələh, itəmat netənim rəha Uhgın min, kən nəmotəhg-irəkis ien eiueiüә min əh,<sup>a</sup> mətō-inu Narmin itəm tətätig e nikitəmat in taprəkis-in narmin itəm tətätig e nətueintən u.<sup>b</sup> <sup>5</sup>İlat netəm rəha nətueintən,<sup>c</sup> tol nəhlan, nəghatən min rəhalat koatən, in rəha nətueintən əm, kən netəm koatətəlig-in ilat, ilat min netəm rəha nətueintən u. <sup>6</sup>Mətō itimat nenəti Uhgın min. Tol nəhlan, netənim itəm kotitun Uhgın, ilat kotətəlig-in itimat. Mətō netənim itəm ilat sənəmә nenəti Uhgın min, ilat kəsotətəlig-inən itimat.<sup>d</sup> O nat u, kitat okotitun əsas Narmin itəm tatən pahrien,<sup>e</sup> ne narmin itəm tateiüә.<sup>f</sup>

### Nolkeikeən rəha Uhgın ne rəhatat

<sup>7</sup>Nikik min, pəs kitat kotalkeike kitat min,<sup>g</sup> mətō-inu nolkeikeən in tətisi-pən o Uhgın, kən etəm tatol nolkeikeən, in təmair wi min muwa nəti Uhgın kit,<sup>h</sup> kən titun Uhgın.<sup>i</sup> <sup>8</sup>Mətō etəm u, rəhan nolkeikeən tikə, in təruru Uhgın, mətō-inu Uhgın, in nəukəti nolkeikeən. <sup>9</sup>Uhgın təmol əp rəhan nolkeikeən kəm kitat nulan, məmә in təmahl-ipa Nətin noan kitih əm,<sup>j</sup> tuwa e nətueintən, məmә kitat okotos nəmegəhən ron.<sup>k</sup> <sup>10</sup>Nat u in nolkeikeən pahrien, sənəmә kitat kəmotolkeike Uhgın, mətō in təmolkeike kitat.<sup>l</sup> Uhgın təmahl-ipa Nətin tuwa, kən in təmol sakrifais atip e rəhan nəmegəhən o rəhatat nolən rat min, məmә neməha otəsol minən Uhgın.<sup>m</sup>

<sup>11</sup>Piak min, Uhgın təmolkeike pik kitat nulan,<sup>n</sup> kən tol nəhlan, kitat min okotəkäike motol mihin nolkeikeən əh kəm itat min.<sup>o</sup> <sup>12</sup>Suah kit təsehmən Uhgın nian kit ne.<sup>p</sup> Mətō okəmә kitat kotalkeike itat min, kən

t 4:1 Jer 29:8 u 4:1 Mat 7:15; 1 Jon 2:18 v 4:2 Jon 1:14; 1 Jon 2:23 w 4:2 1 Kor 12:3  
x 4:3 1 Jon 2:22; 2 Jon 1:7 y 4:3 E Inglis, katən əm 'antichrist,' kən nipətin u məmә  
in tikimir rəha Kristo. z 4:3 1 Jon 2:18 a 4:4 Jon 16:33 b 4:4 2 King 6:16;  
Rom 8:31 c 4:5 Jon 15:19; 17:14,16 d 4:6 Jon 8:47 e 4:6 Jon 14:17 f 4:6 Mak 13:5  
g 4:7 1 Jon 3:11 h 4:7 Jon 1:15 i 4:7 1 Jon 2:4 j 4:9 Jon 1:18 k 4:9 Jon 3:16,17;  
1 Jon 5:11 l 4:10 Rom 5:8,10 m 4:10 Rom 3:25 n 4:11 Jon 3:16 o 4:11 Jon 15:12;  
1 Jon 3:11 p 4:12 Jon 1:18



Uhgin tatəper-ipən e nikitat, kən nolkeikeən rəhan tinatōe-in nolkeikeən e nikitat.<sup>q</sup>

<sup>13</sup>Kitat kotitun<sup>r</sup> mēmā kitat kotəper-ipən lan, kən in tətətig etat, mətō-inun tinos-ipa rəkis rəhan Narmin kəm kitat.<sup>s</sup>

<sup>14</sup>Kənu itimat emotəplan rəkis kənu moatən-iarəp<sup>t</sup> mēmā Tata Uhgin in təmahl-ipa Nətin mēmā in Iosmegəh rəha nətueintən.<sup>u</sup> <sup>15</sup>Etənim itəm tatən-iarəp mēmā Iesu in Nəti Uhgin, kən Uhgin tətətig lan, kən in min tətətig-pən e Uhgin.<sup>v</sup> <sup>16</sup>Kən tol nəhlan, kitat kotitun nolkeikeən rəha Uhgin kəm kitat, kən motəgile lan.

Uhgin in nolkeikeən.<sup>w</sup> Etəm tətətig e nolkeikeən, tətətig-pən e Uhgin, kən Uhgin min tətətig lan.<sup>x</sup> <sup>17</sup>Nian kotətig nəhlan e Uhgin, kən nolkeikeən rəhan tinatōe-in nolkeikeən e nikitat,<sup>y</sup> mēmā kitat kəsotəginən<sup>z</sup> e nian Uhgin otətakil itəm, mətō-inu e nətueintən u rəhatat nolən tahmen e Kristo. <sup>18</sup>Etəm u tərīoah e nolkeikeən, okol təsəginən Uhgin. Mətō nolkeikeən pahrien u, itəm tinatōe rəkis e nikitat, tatəhg-irəkis nəginən,<sup>a</sup> mətō-inu nətəligən rəha nosən nalpīnən tatol kitat koatəgin, kən nat u tatəgətun mēmā rəhan nolkeikeən təsōe-inən əh e nikitat. <sup>19</sup>Kitat kotolkeike itat min mətō-inun Uhgin təmaupən molkeike itat. <sup>20</sup>Mətō okəmā suah kit tēmā, “Io ekolkeike Uhgin,” mətō tatətəhau əh pian,<sup>b</sup> in ieiū.<sup>c</sup> Mətō-inu etəm təsolkeikeən pian u in tatehm e niganəmtin,<sup>d</sup> okol təsolkeikeən Uhgin, itəm in təsehman.<sup>e</sup> <sup>21</sup>Kən in təmos-ipa rəhan nəghatən kəm itat mēmā etənim pah tolkeike Uhgin in otəkəike molkeike min pian.<sup>f</sup>

#### Kitat koatol win mətō-inu kitat koatahatətə e Iesu

**5** <sup>1</sup>Etənim itəm tətəhatətə<sup>g</sup> e Iesu mēmā in Kristo itəm Uhgin tēmən mēmā otahl-ipa, suah u inu, in nəti Uhgin,<sup>h</sup> kən etənim itəm in tolkeike tata kit, in tolkeike min nenətin min.<sup>i</sup> <sup>2</sup>Kən kitat kotitun mēmā okəmā kotolkeike Uhgin kənu moatol nəwian,<sup>j</sup> kənu okotolkeike min nenətin min.<sup>k</sup> <sup>3</sup>Mətō-inu okəmā kotolkeike Uhgin, nīpətīn un, okotol noan,<sup>l</sup> kən rəhan nəghatən otahmen e katīpa itəm taluk-aluk əm.<sup>m</sup> <sup>4</sup>Netəm kotaiir e Uhgin,<sup>n</sup> ilat koatol win e nolən min rəha nətueintən. Kənu nahatətəən rəhatat in tatos-ipa nəsanənən o nolə win e nolən min rəha nətueintən. <sup>5</sup>?Pah min un ilat koatətul əskasik motol win e nəluaginən rəha nətueintən u? Ilat əm un, netəm kotatahatətə mēmā Iesu in Nəti Uhgin.

q 4:12 1 Jon 4:17; 2:5 r 4:13 1 Jon 2:3 s 4:13 1 Jon 3:24 t 4:14 Jon 15:27

u 4:14 Luk 2:11; Jon 3:17 v 4:15 1 Jon 3:24 w 4:16 1 Jon 4:8 x 4:16 1 Jon 3:24

y 4:17 1 Jon 4:12; 2:5 z 4:17 Efes 3:12 a 4:18 Rom 8:15 b 4:20 1 Jon 2:9

c 4:20 1 Jon 1:6; 2:4 d 4:20 1 Jon 3:17 e 4:20 1 Jon 4:12; Jon 1:18 f 4:21 1 Jon 2:7,9

g 5:1 Jon 3:15 h 5:1 Jon 1:13; 1 Jon 2:22; 1 Jon 2:23 i 5:1 1 Jon 2:23 j 5:2 1 Jon 2:3

k 5:2 1 Jon 3:14 l 5:3 Jon 14:15 m 5:3 Mat 11:30 n 5:4 Jon 1:13

### Iaruosan kisil kətəhalol əp Iesu Kristo kəm kitat

<sup>6</sup>Iesu Kristo, in etəm u itəm təmuwa, kən nəhau ne nitan<sup>o</sup> kətioal əp in kəm itat. Sənəmə nəhau əm itəm tatol əp in, məto nəhau ne nitan. <sup>7</sup>Narmin Rəha Uhgın in tətaruosan nəghatən mil u rəha nəhau ne nita, matən-iarəp məto-inu Narmin Rəha Uhgın in nıpahrienən.<sup>p</sup> <sup>8</sup>Kən nuəfiminən kisil kətəhalaruosan iləhal min. İləhal un, Narmin Rəha Uhgın, ne nəhau, ne nita. Kən iləhal u, kətəhalegəhan-in mətəhalol əp nəghatən rəhaləhal min. <sup>9</sup>Nian min, kitat koatəto nəghatən min itəm netəmim koatən-iarəp, motahatətə elat.<sup>q</sup> Məto nian Uhgın tatən-iarəp nat kit, in iahgın taprəkis, kən kitat okotitun nahatətəən təhmin min e rəhan nəghatən, məto-inu in Uhgın,<sup>r</sup> kən in tatətul-arəp o Nətin.

<sup>10</sup>Etəmim itəm tətahatətə e Nəti Uhgın, in tatən nıpahrienən e nıkin o nəghatən rəha Uhgın. Məto etəmim itəm təsahatətəən e nəghatən u rəha Uhgın, tahmen əm məmə in tatən məmə Uhgın in ieiueiue əm,<sup>s</sup> məto-inu Uhgın təmətul-arəp o Nətin, mən-iarəp kəm in, məto in təsənən nıpahrienən lan. <sup>11</sup>Kənu nəghatən itəm Uhgın təmən-iarəp o Nətin, in tol nulan. Uhgın təmos-ipən nəmegəhən lilin<sup>t</sup> kəm itat, kənu nəmegəhən u, katos o Nətin.<sup>u</sup> <sup>12</sup>Etəm tatos Nətin, in tatos nəmegəhən. Məto etəm təsosən Nəti Uhgın, in təsosən nəmegəhən.<sup>v</sup>

### Namnun nəghatən

<sup>13</sup>Iatəte nəghatən min u kəm itəmat netəm kotahatətə e Nəti Uhgın, məmə onəkotitun məmə itəmat nakotos nəmegəhən lilin.<sup>w</sup> <sup>14</sup>Pəs kəsotəginən,<sup>x</sup> məto kotəskasik o nətapəh-inən nat kit e nıganəmti Uhgın, məto-inu kotitun məmə nəghatən u inu, tatem əskasik itat. Nian okotətapəh-in nat kit kəm in itəm təwir e rəhan nətəligən, kən in otəto rəhatat nəfakən.<sup>y</sup> <sup>15</sup>Kən okəmə kotitun məmə in otəto itat, kən nat naka okoteasiə-in-pən, kən kinotitun rəkis məmə okotos.<sup>z</sup>

<sup>16</sup>Okəmə kotehm piatat kit tatol nolən rat, məto sənəmə nolən rat itəm titun nit-ipənən e nimisən, ik onakəfak ron, kən Uhgın otos-ipən nəmegəhən kəm suah u.<sup>a</sup> Məto nolən rat kit əh-ikin itəm tatit-ipən itəm e nimisən,<sup>b</sup> kən io esənən məmə onəkotəfak o netəm min itəm koatol nolən əh.<sup>c d</sup> <sup>17</sup>Nolən rat min rafin un, in təfagə rat,<sup>e</sup> kən məto təfagə rat min əh-ikin itəm kəsotit-ipənən itəm e nimisən.<sup>f</sup>

---

**o 5:6** Jon 19:34,35    **p 5:7** Jon 14:17    **q 5:9** Jon 5:33,34    **r 5:9** Mat 3:16,17;  
 Jon 5:32,37; 8:17,18    **s 5:10** Jon 3:33; 1 Jon 1:10    **t 5:11** Mat 25:46    **u 5:11** Jon 1:4  
**v 5:12** Jon 3:15,16,36    **w 5:13** 1 Jon 5:11    **x 5:14** Efes 3:12; 1 Jon 3:21    **y 5:14** Mat 7:7  
**z 5:15** 1 King 3:12    **a 5:16** Jem 5:15    **b 5:16** Hip 6:4-6; 10:26    **c 5:16** Jer 7:16; 14:11  
**d 5:16** E ves u, ne ves 17, Jon tatəghat-in təfagə rat itəm tatit-ipən itəm e nimisən. Jon  
 tatəghat-in təfagə rat itəm kətəuhlin məntaatəm o Kristo ne netəhauən rəhan netəmim.  
 Nolən rat min əh, tatəgətun məmə netəm koatol ilat kəsotosən nəmegəhən lilin, kənu  
 məsin min u məmə narmilat tinimis. Nat u inu, Jon tatən əhag-əhag kəm itat e 1 Jon 5:12  
 ne 1 Jon 3:14. E Mat 12:31-32 tatəghat-in təfagə rat u, nən ratən Narmin Rəha Uhgın.  
**e 5:17** 1 Jon 3:4    **f 5:17** 1 Jon 5:16; 1 Jon 2:1

<sup>18</sup>Kitat kotitun mēmā etām tətaiir e Uhgīn<sup>g</sup> tāsəkəikēən e təfagə rat, mətō-inu Nəti Uhgīn tatəmīk ətain wir in, kən etām rat u Setan, təruru nekən.<sup>h</sup> <sup>19</sup>Kitat kotitun mēmā kitat nenəti Uhgīn mīn,<sup>i</sup> mətō netəmim rəha nətueintən rafin, ilat u kotatig e nelmi Setan.<sup>j</sup> <sup>20</sup>Kitat kotitun mīn mēmā Nəti Uhgīn təmuwa kən mos-īpa nenatīgən kəm itat,<sup>k</sup> mēmā kitat okotitun in, u in nīpahrienən.<sup>l</sup> Kənu kitat koatətul-pən e Uhgīn u in nīpahrienən, mətō-inu kitat koatətul-pən e Nətin Iesu Kristo. In un, in Uhgīn pahrien, kən in nəukətī nəmegəhən līlin.<sup>m</sup>

<sup>21</sup>Nenətīk mīn, otagīm rəkis o natimnat mīn itəm okotos nəme Uhgīn e nikitamat.<sup>n o</sup>

---

**g 5:18** Jon 1:13   **h 5:18** Jon 14:30   **i 5:19** 1 Jon 4:6   **j 5:19** Jon 12:31; 14:30; 17:15  
**k 5:20** Luk 24:45   **l 5:20** Jon 17:3   **m 5:20** 1 Jon 5:11   **n 5:21** 1 Kor 10:14; 1 Tes 1:9  
**o 5:21** Nəghatən Kris ətuatip tatən mēmā, “onakagim o narmi nat mīn,” mətō Jon tatəghat-in təfagə rat, mēmā in tahmen e narmi nat, mətō okəmā kōtolkeike rəhatat təfagə rat mīn taprəkis-in Uhgīn, kən təfagə rat in tatos nəme Uhgīn e nikitat.